

La Lettre Jèrriaise - Marianne Sargent - Lé 6 d'Févri 2021

Bouônjour bouonnes gens. Ch'r'est mé, Marianne Sargent, tchi vos présente la Lettre Jèrriaise chutte sémaine. Aniet, j'm'en vais pâler entouor mes cattes, un sujet heûtheux parmi les mauvaises nouvelles dé chu moment.

J'avons deux cattes. Ieune nommée Scampi et eune aut' nommée Arnie. Il' ont onze ans. Scampi est pus p'tite qu'Arnie. Les deux sont rilyies. Arnie est néthe, grise et breune et Scampi est néthe, breune et jaune. Arnie est eune fil'ye comme Scampi mais jé n'savons pon don jé chouaïssînmes un nom pour un garçon pour lyi. Ged chouaïssît Arnie pa'ce qué sa méthe aimait Arnold Schwarzenegger dans l's années huitantes.

Quand Scampi 'tait janne ou soulait grîmper et sauter alentou d'la maïson et quand oulle avait dans les sept s'maines ou s'câssit la gambe. Ou dut rester dans eune câsse pour siêx s'maines. La pouôrre chatte. J'crai qué l'expéthience lyi dêroutit l'chèrvé pa'ce qué achteu oulle est hardi nécessaireuse. Ou miaûne et miaûne et ou saute sus nos gambes. Oulle aime à s'assiêthe auve nous. Ch'est l'temps seulement quand oulle est hardi contente.

Scampi ouït haut don ou n'a pon peux d'rein. Arnie est complètement difféthente! Oulle est bein peûtheuse. Oulle est eune 'scaredy cat'. Oulle a peux dé l'aspithateu et quand la télévision est trop haute. Ou n'aime pon la rithie ou la chant'tie. Duthant la Séthée d'Guy Fawkes ou s'fouôrre dans not' chambre souos l'liet pa'ce qu'oulle est êpeûthée des feurs d'artifices.

Scampi est hardi pouôrrement. Oulle a inflammatory bowel disease. Don ou dait prendre onze boulets châque jour. Oulle est allèrgique au poulet ès aut' viandes. Ou peut mangi du saumon en tinne auve des galettes espéciales seulement. Malheutheusement, oulle aime bein l'poulet, mais si ou lé mange ou vomit et sa souothis rendre l'âme (her pancreas gives up the ghost).

l' y'a deux trais ans ou failli mouothit et acouo duthant chu Noué pâssé. Ou restit auve lé vétérinnaithe pour deux s'maines d'vant Noué et eune aut' après. Ou pèrdit du paids et ou dévint maigre comme un chent d'clioux. Eh bein, lé vet nos dit qu'oulle a la maladie d'chucre. Ma pouôrre p'tite fil'ye. Achteu ou dait prendre l'insulin deux fais par jour étout.

Comme mé, Arnie aime bein l'mangi. Oulle a 'té à s'avantagi d'la situâtion auve Scampi et oulle a 'té à mangi un tas d'galettes espéciales. Malheutousement, oulle est bein b'sante achteu. Lé vét dit qu'ou dait mangi mains. Don, j'avons acaté un aut' patchet d'galettes espéciales pouor les cats tchi sont trop gras. Scampi est bein malheutouse achteu pa'ce qu'ou veurt mangi les galettes à Arnie. Il à 'té nécessaithé d'acater des dgichons espéciales auve des couvèrcl'yes tchi s'ouvrent auve des bat'ties pouor empêchi les deux d'mangi les galettes d'l'autre.

Les deux ont gratté nos meubl'yes alentou d'la maïson et Scampi a vîmi sus l'tapis dans l'parleux à touos buts d'camp. Scampi saute sus l'établyie dans la tchuîsinne et dans l'tumble drier étout. Mais malgré la peine, j'adore mes cattes. Scampi a 'té à coté d'Harô d'pis i' fut née. Oulle est sa miyeuthe amînne. Arnie s'couoche auve li toutes les niéts pouor eune histouaithe. Les deux s'assiethent sus nos g'nouors toutes les séthées. I' sont là quand j'rarrivons siez nous. Quand j'sommes tristes i' sont là. Vive la compangnie ès cats.

À la préchainé fais. Prennez soin dé vous mêmes et j'vos envyie mes milleurs voeux. À bi pouor achteu.